



墓誌銘六篇

誥封奉政大夫董公墓誌銘

嘉靖甲辰年五月七日董大夫卒厥子漢中守漢儒
將以乙巳年某月某日葬公於藁城乾隅先考太學
公墓左奉其友永平守孫君應辰狀不難數千里謁
銘於東洲崔子東洲子讀其狀惻然悲慨然歎曰日
董漢中筮仕吾通政平人和飭躬潔守吾以爲必本
諸父母然也廼今知其果有自乎孫永平邑人也其

維揚崔桐撰

爲言信可徵乎按狀敘公之孝友曰公諱廷佐字良臣號留國考城人卅角時能哀父喪及葬會大雪徒跣沒股火且久之僵乃蘇母范嫗居族有利其改節者計強之范竟不爲奪公孝養周至以慰母心且友愛其二弟范志由是益堅敘公之用世曰公少游鄉校即受知於督學諸公數竄屢蹶於場屋嘉靖癸未以選貢授南宮訓導其爲教一以敦本崇雅爲務旌孝廉誦浮薄七習知所向往督學御史有以威福加諸生者公上書爲極論作養士氣之道有曰今日氣先委靡則異日何望其伏節死義哉僚長有加私怒

於寒峻者公以大義諭之後其生果登第居八年科第相踵時論以爲功銓曹廉其賢陟雲和教諭公亦倦於仕也尋乞老以子官 誥封奉政大夫南京戶部廣東司郎中敘公之家教曰漢儒登乙未進士初知通州考勸過家行李蕭然公慰之曰貧乏不能自存此是好消息古人之法言也女其勉之及累官南京戶部郎中每申前訓俾置座隅以自勵及守漢中瀕行囑別復以廉潔忠義誨之再再敘公之器識曰公生而豐體美鬚巧思多藝其高標逸韻恥與世俗低昂簡言慎動疆禦不能屈奸佞不能諂至於接物

温如也嘗鬻一騾於涿市誤多其直金五兩追而還
之其立心不欺如此敘公之世曰公配甯氏 誥封
太宜人藁城主簿讓女有婦德生三子長即漢儒次
漢卿庠生蚤卒次漢傑庠學生三女長適崔卿次適
庠生范希曾次適庠生李時亨孫男五曰勅曰詔曰
誥俱庠生曰論曰講女孫三曾孫男二曰實芳曰實
堅曾孫女六尚幼董之先南宋時有諱俊者爲元帥
封壽國公自景州徙居藁城俊生文炳爲元中書左
丞謚忠獻文忠爲樞密院事追封趙國公謚正獻文
忠生士珍爲太傅謚清獻士良爲開州尹士恭爲御
史中丞後數世有曰大老者元末遷考城大老生數
文以明經任寧鄉知縣改棗強所在有聲教文生英
英生繼先國子生善楷書精法律未仕而卒配即范
氏公所自出也遡其本始蓋出自董仲舒云東洲子
曰予始謂董漢中之賢本諸留國廼今知留國之賢
支裔之盛未謂非仲舒夫子開其先也銘曰翁德匪
孤煌煌道脉淵源仲舒翁澤匪屯端模肅範諸生在
門公祿匪不侈鴻褒豐慶有蔚其子翁乎翁乎生也
懿其修死也得其止

鶴霄史君墓誌銘

史君諱軒字冕之家世海門人曾祖某祖某父春並
有隱行爲鄉評重母沈氏君生而穎敏少補邑庠第
子員克勵誦習既長不偶飄然有選舉之志廼授
王府典膳道遙丘林業耕教子於世故澹如也因自
號鶴霄云君素善予予每宦游過里君邀予偕二三
耆彥投壺舉白頗罄交歡壬寅秋予以先大夫憂歸
就土苦君尚數過予致慰勤勤無何君偶疾不可作
矣厥子紀臣輩卜以乙巳年某月某日葬君於某處
之原以墓銘謁予予曰鶴霄君隱而德者也吾其能
辭銘哉君性敦朴言笑不苟和順有容有犯不較濟

貧須死見義樂爲宗族繇役獨任其難鄉人有負其
貸者亦棄券無所責識者以爲有古君子風焉初配
崔氏繼成氏孫氏生子四長紀勲 王府典膳嗣伯
兄後次即紀臣國子生次紀堯早卒次紀禹邑庠生
女二長適庠生陳九思次適潘樞孫男四長銳國子
生次鐸次鎔庠生次銓孫女五長適庠生姜烈次適
成璉次許聘徐允迪次許聘予孫瑞除一尚幼曾孫
三俱幼君生于成化庚寅五月二十二日卒於嘉靖
癸卯五月十三日得年七十五嗟夫君少與予同業
長而同遊老而連姻是知君者予也爲之銘曰王也

在山不珪不璋玄精守旁珠也在淵不砂不鋼其川
愈光矧達人之抱冲獨鼓風而霄翔生得其真死垂
其芳餘休遺後昆而煌煌斯可以奠君之永藏

贈文林郎自軒汪公墓誌銘

東明汪君有執以正德己卯鄉魁授惟揚海門知縣
甫三載考績銓曹以治狀聞 天子嘉之詔封文林
郎得推恩其父洋如子官母趙妻韓何俱贈封孺人
故事外職非治迹卓異者不得推恩斯典蓋殊數也
東明君以余爲海門人雅愛君持其友刑部主事黃
君顯狀謁余曰有執無似生平以立身顯親自期待

先考存日亦每以光裕後先屬恩兄弟今茲猥承

天寵吾先考無遺悔矣自先考之沒以己亥正月十
一日藁葬于城西十五里崖母山之原墓石尚虛願
徵言於下執事按狀汪公洋字克深別號自軒其先
寧國府旌德縣人世有長者德以仗義樂施爲海南
所推重焉再傳至衍公父也早卒母梁孀居以經術
教二子伯曰海仲即公二子憤其父之不年母之苦
節也遑遑焉交相飭勵以勤學奮身爲二親報會伯
氏蚤世公亦蹇連不即顯弘治甲寅以陵水庠學生
充廷貢正德甲戌授淮安宿遷丞時中貴負勢符節

絡繹夫役洶洶逋竄相踵渠長多以不任被繫公慨然曲請寬以限制所賴原免者甚衆居五月聞其母梁計即呼號就道凡所歷俸給棄去莫之顧也服闋北上道出淮宿遷父老競出迎送戀戀不忍釋再任閩之晉江時有執以計偕上春官便道省公公歎曰吾可以去矣丈夫仕宦以得志行道澤及生民爲快事今吾碌碌末秩古人謂予不負丞而丞負予將安用之忠君報國當付之後人耳遂乞老偕有執以歸公性孝友事其伯兄有禮初不得於嫂胡胡數毀公於伯氏伯氏覺而逐胡公爲固請以歸伯氏無子公

命有執爲共烝嘗有執重公之義至於今孝思不廢如子禮公居官兩地家殖不長尺寸林隱十八年惟歌唐人詩以永日暇則偕一二耆舊棊酌笑談恬如裕如求田問舍之事非所聞也嘉靖丁酉歲十一月十八日以疾卒生於天順甲申得年七十四趙孺人某年先公卒孺人賢淑克相公繼室陳子男二長有容瓊州府學生謹厚有父風次即有執孫男三長且樂會庠生次旭次堤孫女六長適瓊山王懋之子某次適陳教諭善行之子某次適文昌林某之子某次適東莞范知縣之子某次受聘文昌林監生之子某

一勿銘曰誰謂公名之弗揚卓有遺美誰謂公位之弗崇庭有令子母也克承伯也克祀兩地哦松蜚聲盈耳歸政林棲高風山巔赫赫龍章侯封百里後祿繩繩令終茲始公公兮公公兮可以不死

贈中憲大夫都察院右僉都御史端公 封

恭人唐氏合葬墓誌銘

都察院右僉都御史虹川端公廷淑巡撫山東治狀懋著 天子以爲賢進左副都御史入佐院事同朝方以內臺得人爲喜未蒞任而公母太恭人卒禮曹以恤典請 詔賜諭祭一壇殊恩也公介伴馳狀請

東洲桐曰先公卒日赦甫二歲先母孀居五十有二年矣念赦六歲時尚乳食聞吾母哭父聲今猶在耳父卒兒在襁褓母卒兒在宦途不孝之罪莫大焉惟執事於赦爲鄉同年宿好可以世講赦將以某年月日合葬二逝者於白芩山陽願執事銘諸墓石用垂不朽俾不孝藉是以道罪戾執事之德也按潛溪宋學士端氏族譜曾司直南州居士傳端之先爲端木子貢之裔衛人也元末諱邦達者生以良是爲五世祖以良躬以善號拙翁者仕元爲刑部侍郎 國初拜湖廣中書外省參知政事晚歲僑居溧水以良

時寓河南酸棗門來依焉既去水從端姓占籍當塗
以善生孝思 高廟召見命居江西即南州居士也
以良生原以子宏貴封監察御史宏累官浙江左右
政使配張氏封孺人生三子長文贊次文輝次文用
字國華號九峯虹川公父也九峯公生而穎悟不群
布政公命師事李狀元吳高解元禴爲文務古雅不
作俗學語童時初就試輒冠時輩廩育邑庠既屢試
必登首舉質素羸弱重以苦志力業臞羸多病嘗侍
布政公於浙藩得滯疾頗侵丙午歲復疾而蘇布政
公乞休歸弘治乙卯歲以疾卒九峯公傷寒表是歲

汝作遂不起配太恭人唐氏邑人醫學正科賓之
三女賓老儒鮮可許必欲得佳壻故以女歸九峯公
太恭人善事舅姑亦爲舅姑所愛重每宦游山東浙
江必携九峯公暨恭人以從初九峯公浙藩之恙也
太恭人懼其不可活將以帛自盡張孺人聞之亟救
止丙午之恙也張孺人亦病痿布政公林居清約家
無紀綱僕祇一力供薪水太恭人躬親藥膳艱辛百
萃夜復更衣祝天不就寢者四十餘日夕乙卯歲太
恭人夢履高樓一黃冠皂衣翁持匙盞語之曰救汝
三人太恭人食藥一匙覺快透毛骨復以食虹川公

獨九峯公避去不食及寤馨香若有聞九峯公尋以
哭布政公而疾作乃不可藥之徵也時太恭人知其
無能爲剪股肉三和粥以療公公若有覺焉謝曰汝
心盡矣吾不能食也公既卒太恭人痛所儀之不年
念遺孤之未立惻惻支持撫生哭死至老不衰公生
於天順戊寅年三十有八以虹川公貴初贈文林郎
監察御史再贈中憲大夫遼東行太僕寺卿三贈右
僉都御史太恭人生於天順丁丑年九十初封孺人
再封太恭人三封太恭人子四曰廷輔義官廷佐蕭
田訓導廷相義官廷赦其少息也女一曰慕貞適同

七 林校子岐山早寡遵母訓守節至老無爽德孫
十一 曰錡散官鈇鉞皆庠學生銓業儒鑰鈿鎡鏑
孫孫女六並適聘右族曾孫三壽齡壽堅中元銘
曰嗚呼大夫蘭桂其姿胡折而弗滋組繡其章胡斲
而弗揚哭父而死道固得其止令妻而壽後事貽其
偶 龍恩輝映世克蒙其盛澤在四國有子流其德
嗚呼大夫窮其通哉替其隆哉孰謂匪自其躬哉
迎功郎曹公墓誌銘

實姬姓自曹叔肇有茅土遂以國氏奕奕載德
獨久逮趙宋武惠彬以仁武定江南其九峯

原後建炎南渡始家姑熟既避兵居通之縣西場遂
為通人高和軫生伯齡軼才廓度締造恢宏以巨族
右於通生子靖領鄉薦判大同府性純厚有長者風
靖生伯子璉是為樵雲君豐姿偉器家聲益展以助
邊授七品秩次子璠令魯山璠令賀從子琰鄉貢士
蓋其先祚淵淵故代有仁賢如此樵雲君室常熟湯
氏生博字守約是為南山君美資性力經業自以青
雲可力致也竟不偶就例貢入太學授萬年丞能廉
勤其政以為民休且翊其令於循良萬年實蒙澤焉
博母氏服闋改丞上虞上虞多奸政南山解紛理劇

懋有治迹故受知於兩省監察使李君循義周君汝
員並有嘉褒焉銓曹廉其賢陟寧海令南山性本踈
豁馳逐聲利非所好也遂投牒去初南山孝事樵雲
君戀戀不忍舍故踰期十年不謁選必生養死葬畢
情事而後行從父魯山賀令之喪皆襄事有禮撫旌
屬皆有恩既歸隱守成先業教子讀書增飾樵雲君
故園誅茆亭流環以奇葩嘉樹暇則命觴召侶取適
忘倦每至大醉輒頽然嘯歌殆不知天壤間有塵俗
事也南山素重義宜俗老孺咸得其歡心雖殊邦遠
客稱個儻者莫不知有曹南山云生成化甲辰九月

八日卒嘉靖丁未二月十三日得年六十四配袁氏
晉潘檢校祭之女先南山七年卒十是年某月某日
合窆焉子男五大有大亨太學生大同大輿大來俱
州學生大同嗣賀令女二長適州學生朱淮次許適
州學生姚含早世孫男四昌胤昌祚餘幼女五俱在
室大同以吾姑爲賀令配於吾門有連也狀南山行
偕其兄大有輩以墓銘謁余曰南山吾得其素舊矣
是宜銘銘曰赫赫宗周皇皇建侯式廓曹宇用申厥
惟曹有貽延厥孫謀翼宋之隆義聞載流我明
遐澤靡息有雋有又有順有直瓜瓞綿綿南山

服德孝爾承家忠爾報國惟江之右惟澗之隈民有
父母邦本用培耋老明農紆駕過迴樂彼茂林可詠
可杯靜者作朋養恬及紀夢入龍蛇哲人則止智者
達生仁者不死誰其嗣之曰有令子

將仕郎潘子芳墓誌銘

吾壻潘桂字子芳別號蟾軒通州東城村人以國子
生謁選天曹得東陽簿比歸厥父大輔翁暨母姜相
繼卒子芳抱病躄踊閱數月亦銜哀而卒嘉靖丁未
十月三日也初子芳既拜職其友咸駭且問曰子何
不謀諸婦翁乞一美官廼小就亦吾輩若耶子芳曰

吾翁平生養重自愛不屑干人以私人亦不能干以私且吾自壻翁門服翁之訓未嘗以細故敗翁事况官職有定分怙力競進非吾志也太宰漁石唐公聞之喜且謂予曰公壻雖少屈東陽金華善地民俗醇厚勉為之適以章公美也子芳亦欣欣受牒以行而今已矣非命也哉吾女痛子芳德宜選祉而乃不年也事親孝虛昆季友而不得盡情事於父母也終身勤儉僅得一命而弗及竟也悲號閱歲而莫之已予慰之曰女毋過哀人之生前欲豐行死後欲豐名甚富貴矣而何加於匹夫盜跖壽矣而何裕於天孫也夫得年四十有八不為夭也遊太學授邑秩不為賤也且以篤行雅操聞為吾所重卒之日弔者無親疎靡不歎惜亦不為無述也即使位極人臣齒登耄耄而負國忘公植邪覆正為名教羞賢不肖何如執厥兄格弟朴嗣子遷卜戊申十二月朔葬子芳于祖墓吾甚哀之銘曰嗟嗟子芳間氣清姿頽風軼翻孝義克敦操持潔白胡裕德而嗇年拜官而埋璧無乃彼蒼者殆有意焉俾汝生為人所重死為人所惜耶

錢母陳氏墓誌銘

母氏故大學生陳德章之女今大學生錢瑞夫之配

瑞夫迺翁倍之雅善德音聞母氏有聞懿請以室瑞
夫母氏之母高氏性聰慧睦親宜俗有丈夫行故母
氏之賢酷似所生既歸錢克執孝敬姑許氏甚宜之
處伯叔暨諸姑家介婦咸有禮視意婢亦有恩推其
餘愛遠逮祖戚若戴陸許翟諸族修舊好無闕焉瑞
夫性怛易無牟射心母氏欲遂其好也力任家政百
備整整不以煩夫子教其子九疇以禮讓遣游邑庠
卒業成均饗祀賓筵羞實必躬親務豐潔舅之側室
王氏嫠居或勸之改適王安母氏相依勤業志竟不
渝鄉有江令子以罪當徙乃鬻女以行母氏哀之亟

贖而育諸閭及笄乃嫁之其賢淑大率類此子一人
即九疇聘潘氏孫一人祖祐母氏體素豐末歲以痰
痿生于弘治己酉三月二十七日卒于嘉靖庚戌十
二月二十八日得年六十二卜今辛亥十一月十八
日葬于新邑瞿竈港西原九疇以予于母氏有世姻
乃謁銘嗟乎予每憶德音翁于予爲忘年友學則同
師出入必相偶蓋連姻而契交游而誼者也己亥海
濤之變二子道善並溺乃公遺息復已矣安忍其泯
焉無聞邪銘曰碩人有歌載邇厥源母氏攸鍾世緒
可援士女宜家惟孝惟敬翌夫以安淑子以正求仁

敦義視故惟新餘休旁庇哀此瘳人謂仁者壽享胡
中止物者可化懿者不死鬱鬱西原瀟瀟河陽藏珍
千禩太史紀芳

奉訓大夫海厓姜公墓誌銘

余友姜大夫卒越明年將葬事從弟軺率厥孫慶麟
董謁銘於余奉大夫治命也嗟夫大夫於余自少至
老以道義相規爲益友肝膽相照爲知己友乃余安
忍銘大夫哉余又安能喑焉使大夫沒沒無聞也哉
大夫通州餘東人諱輅字一中別號海厓大父宗本
佃儻不羈克海岸廩生未仕卒父惇亦蚤卒母許氏

改適大夫方齠齠鮮見躬軺軺隻字於大母

少長從父時宜時和憐其有美質遣入邑庠大夫

志力學夜讀秋膏或不給燃薪以代弘治甲子領

天鄉薦試春官屢不第正德辛巳拜郴州知州其

政不飾聲名務以忠信仁厚取實效郴雖山郡一

咸相孚相愛無弗頌大夫者嘉靖丁亥九月江同

刻表其獎善良垂克仰操持潔白舉措公平不

治郴獨以氣性執直近拂理事每面亦辭遽不

鴻中館口能卒以是忤郡守棄官東歸林居唯教

孫結社友構亭繕園以吟酌自怡親故有招飲

飲必呼散舉白素。公儀外足跡不履城府與
人交必傾倒中臆虚心服我無忌嫉心亦不作交涼
能蓋篤實君子也故子每談益德士必歸之晚歲以
疾接不食於行者數年竟以是卒庚戌正月十二日
也生於成化丁酉十一月十一日得年七十有心娶
崔氏性溫惠克勤儉十二長廉序生次烈序學生俱
先卒女三長適曹大賓次適潘然次適國學生陳僑
孫五長即夢麟序生次夢弼夢龍夢旦夢陽孫女一
適庠學生崔槐夢麟輩卜辛亥十一月十九日葬大
心於新竈運河北原嗟乎大夫長吾三歲每憶年十

四五時同受業於吾舅盛廷望氏書餘言志輒以作
好官樹功業自期待大夫果任民牧施有惠績且始
終一德不負平生也乃今以痾疾終二子並短世天
之右哲人何如哉是未可謀也銘曰偉哉大夫不偽
其中無愧於獨不虛其官有軼於俗胡子之受於天
者莫或虧而天之所以相吾子者未戩穀意者樹聲
懸望巖巖馥馥可以此贖

節婦火宜揚妻葉氏合葬墓誌銘

余日宦游閩浙間聞吾揚江都有火節婦者葉氏女
年甫二十有三夫錢卒枕藉草苫泣血三年服闋或

風以改節語葉怒且罵曉以貞烈大義即引刀刺面
示不可奪余爲私識之以謝史職未特書也旣余卿
佐禮曹職在旌節義以植綱常時葉年未如例尚有
待焉已酉七月二十有九日葉以疾卒厥兄憲副省
菴葉大夫狀妹平生授其孤原謁銘於東洲余始而
悲旣而喜曰是余宿志也銘其能辭按狀火之曾祖
曰恂者爲揚州衛千戶侯祖晟襲父官父城號樂嫁
有隱德於葉之曾祖兩淮轉運同知思銘暨思銘之
子賢賢之子贈刑部主事樂菴翁萬爲世好樂稼翁
爲其子鉞謁婚於樂菴翁節婦翁女也年十八歸於

火事其姑鄒曲盡婦道每以勤業力本勗夫子待夫
之二第大學生鈞鉉暨諸姑並有禮視僕婢咸有恩
生一子即原甫七月而父卒無何樂稼翁亦卒節婦
佐其姑治喪如禮事姑益謹教子益嚴俾就傳親仁
不恡供億原年未冠與二叔異爨戒以務勤儉擇交
游端動履率之稼穡三年營宅一區又二年娶婦蕭
氏又二年爲應例入太學君子謂火婦旣貞其節且
克成子利家是爲三難父老學校咸以爲賢聞之郡
縣聞之觀風使觀風使以制於年也檄郡縣姑以節
婦書其門貞節顏其堂加餼率以勸其終士大夫曰

是可歌已群爲詩章以鳴之數歲中原舉三子曰彥
升彥卿彥功節婦延吾日所以不即死從吾夫者以
一息未立也今三有孫矣死更何憾但老姑在養未
忍長別耳節婦宿有痰疾先夕憂其夫與之語若德
其有功于火然旣寤悲慟幾絕疾大作不可藥矣生
正德丙寅仲冬十有八日得年四十有四節婦未字
時通孝經閑禮度哀哭父喪孝母扶疾以賢女名旣
字而多有懿德殆天性云鉞字宜揚號承菴約身循
義不墮家聲節婦之相實多原卜辛亥歲仲春十有
三日奉母恹啓父窆而合葬焉銘曰二十年前孝篤
業昌教子肯堂於夫有光二十年後蘭桂芬芳貽謀
允臧死亦何妨烈烈孤貞生也冰霜死復同歲世短
聲長

聲長

崔東洲集卷之十八

維揚崔桐撰

墓表五篇

都察院右僉都御史一泉王君墓表

世有介丈夫秉義勵操與時齟齬者可謂窮乎斯固世俗之所窮也君子以爲達焉有若風靡波馳終身富貴者可謂達乎斯固世俗之所達也君子以爲窮焉余考一泉王君之出處而重有感也夫君清宛人諱德明號一泉余日在史館君遺其子舉人闈問業於余門聞之館寮曰是其父能文章舉甲子鄉試戊

辰進士主司崔後渠奇其文可以魁天下者也余索其所謂文得經義若干首古文若干首果有奇氣可奇也又聞之朝士大夫曰是其父有異政章章在人耳目者也余求其實筮仕封丘知縣劉瑾黨廖鵬荼毒河南三司以下咸受指使君獨不屈上官以爲異已苦以難平之訟君易易理之庚午鄉舉鵬之子鎧冒籍祥符貨文士代筆御史輩擬以魁選君發其奸亦取列第六無何給事中陳鼎劾鎧除名君聲益章既調嘉善寬糧長之積逋均豪猾之隱稅興學校建射圃以振作寒畯且設兵閱武卒成桃源之建時有

御史按浙憤嘉善之不善事也多方挫折君不爲屈明年御史敗竟免中傷晉戶部主事運大同軍儲不私羨餘監臨清鈔解稅倍昔晉兵部郎中乞養病家居蓋耿介有爲而薄於勢利者也丁亥余出補藩臬於君不相聞者餘十年庚子余承乏國子祭酒闈來謁聞君已不作四年矣問君末節於闈迺知出守懷慶會歲饑君減征損費貸粟散居多所全活是歲禾麥瓜諸瑞疊見天子以爲賢褒以金幣晉太常少卿尋晉右僉都御史巡撫山西大同之變提兵境上爲聲援劾奏避事文臣納賂將官者以振風紀且以

計得石州巨寇常誠心悉平其黨獨以治吏太嚴防
奸太密貪夫固側目伺之會行法宗人竟坐免臺臣
嘗數薦之未及起而卒寔嘉靖丁酉九月十有八日
也得年五十有六遡君之世本元學士磐之裔傳至
明善明善生忠忠生浩浩生恩君父也贈都御史母
楊氏贈恭人配郎氏封恭人子男三長即闈次闈郡
學生次文印女二長壻指揮謝宸次幼女孫一闈輩
上庚子十月十有二日葬君於宛城之南嗟乎一泉
自筮仕至其終稜稜風節動違時好雖數遭拂抑而
屹然特立無所沮奪是世人雖欲窮之君亦何往而
不達也哉余昔考諸寮友士夫之評既聞諸厥子之
言頃讀後渠崔宗伯之銘廼信君果介丈夫也

太學生俞君合葬墓表

俞君維揚江都人也名攻字崇治年五十一歲嘉靖
甲申四月三日卒葬某地後十五年爲嘉靖戊戌其
配毛氏卒九月十七日也壬寅年某月某日出藁葬
啓君竊祔焉其友若戚迂湖葉大夫蜀岡盛大夫嘗
爲之狀而徵諸銘矣君子材復以合葬表謁東洲崔
子崔子曰吾素善君之從弟都諫崇禮且葉盛二大
夫鄉之信人也諛墓之誼吾知免夫按二大夫之狀

曰君生而秀穎老成父從仕翁竒其必能子也館穀
名士以授之業然而數竒屢弗第廼奉例卒業大司
成君性孝友執親之喪哀毀逾禮處其兄若弟敬且
愛怡怡如也兄弟以子姓蕃息請異居君涕淚從之
田廬服用僕媵取其下者卜居務近故廬有所事必
諮諸兄如昔是以其仲兄教每以君行淑其子肅乎
有刑于之風焉君處里閭媪黨咸有恩周貧振弱不
以自德有稱貸者輒應之或不能償輒棄券勿復責
會歲凶多道殍君求而掩之又多置棺以殯所識之
莫能舉者嘗夢一髯丈夫語之曰汝當有兩大厄以

汝有陰德不汝厄也正德甲戌偕教之子渡江夜泊
大儀津忽群盜入其舟君驚入水大呼曰若屬寧盡
取吾財毋加害吾幼姪波濤中若有掖之者頃復近
舟盜異之遂遁去明年胸發疽滯病不可瘳復夢有
語之者曰二介人能辦此果得竺姓者愈之蓋竺乃
二介也君乃思昔夢爲有徵竟不爲厄者神實相焉
自是無復仕進志乃選勝於城之西北面山枕水亭
池其中環以卉木扁其所曰怡情因以自號云時携
一二同志游讌嘯詠徜徉移日人莫窺其際也君始
配蕭氏有懿行先卒繼配毛氏江都天祥翁女壽昌

尹天秀之猶子也既婦俞每以其姑王不及養爲恨事其舅氏從仕翁甚恪事怡情君得婦道君游邑庠則篝燈爚茗資其誦讀君游國學則綜其家政俾無內顧君病疽則齧滌勤劬誓以靡他是以君重之相敬如賓友者三十年終其身不置婢妾君卒毛痛之幾滅性教子勤學力業俾終父志教女必以古列傳孝經爲閨則宜其伯叔娣姒莫有間言閔卹貧苦亦未嘗責報嘗雪夜有僵仆於門者毛亟命內之室飲之燠之乃甦及晨以米帛爲遣有傳嫗者寡且貧厚貽之俾終其節哀其孤孀猶夫已也生子一即材太學生孫四觀光觀順觀民一尚幼女孫二長適太學生顧天民次在室俞之先大寧漢人曾大父文友文友生永貴揚州衛中所百戶永貴生英字堯卿即君父從仕翁也配王氏生五子敏教數牧君后季敏捐禔使教七品散官君叔父某按察副使都諫君父也嗟夫不有兩缺曷章其婦不有孟光曷章其夫怡情弄之夫婦維德之行時所鮮儷來之貞珉斯其無朽矣

廣西按察司副使中憲大夫錢君墓表

嗚呼此吾友南浦錢君之墓也君諱鐸字振之號南

浦少時與余同師承托好論心每以顯名樹勸相期
待既余授史職君亦次第薦已卯鄉書舉辛巳進士
即館余所間語余曰疇昔之約發軔有階矣唯克考
終又吾願也君累官至憲臬駸駸有軒舉展揚之勢
乃以被論中阻君以為非其罪也竟未白以殞太學
生冢嗣藻次嗣薰十癸卯十二月某日葬君於清幹
鄉先塋奉其母極合窆焉謂迺翁於余為齟齬交也
謁余以表其墓余曰嘗槩論南浦子矣其為人殆有
志者與竒所遭非人也按君釋褐初會

武宗皇帝大行即奉

命纂修廬慶諸郡實錄有精

核功嘉靖癸未授刑曹主事繫囚冬月多僇斃君請
為晨設漿粥于今秋之甲申秋以論大政得寬 旨
沾危僅免丙戌奉 命論省江南重獄讞籀稱不寃
丁亥陟員外郎時勲戚坐占役伍卒奸法者屬君聽
之權貴或以為請君不可曰法弛自近是國無刑也
必以其惡從數輩為戮戊子陟郎中西樵太宰廉其
才出知端州端故多麗政君展布心力悉為剗剔端
士鮮科目以營舍內遷為谷君為白當途上善地並
新二庠嗣是登雋果相踵士論功郡守焉以父憂行
服去及闕改湖藩鄖陽鄖山郡也土瘠風夷長吏苦

無成績君務以仁禮爲治民漸化德無何陟廣西按
察副使飭兵府江府江荔浦諸郡三洞寓宿萬山巖
嵯巒虜猺醜怙阻積毒民病焉君至輸以悃幅諭以
利害嚴以偵邏威以舟兵於是乎悟者歸命悍者竄
伏且生得大愆數十人戮之以徇土人謂三十餘年
無此績也監察使悞以君爲不共乃刺君短遂致祿
余時以南陟過里君訴余曰吾平生以克終是期迺
今以求全中蹶恨無所從諍耳知我者吾子也別逾
月君訃至矣君敦孝友峻廉剛寡笑語治家儉取舍
明交游慎斯其章章聞者獨以性簡執任已自信不

能與時推移此其尤所及也室李氏於余室皆稱其
周之自出封恭人婉慧慈孝聞德無缺君安焉終其
齒不置妾恭人亦敬侍君有冀孟風君卒恭人哭之
哀寢食起處無不念在君者未及歲心疾而卒君生
成化丁酉十一月十七日卒嘉靖辛丑十二月二十
二日年六十五恭人生成化丙申十二月二十三日
卒嘉靖壬寅某月某日年六十七生二子即藻薰三
孫九德九功九敘三孫女長歸通州千戶王廷揚蚤
卒次聘徐允升次尚幼君之先高祖貴一貴一生忠
忠生遂遂生盛號貞齋有隱德能以善富生三子長

錠海門庠學生中歲卒次鎰太學生未仕卒次即君
貞齋以君貴贈中憲大夫鄖陽知府君母戴贈恭人
君子曰南浦子上焉未嘗負其君次焉有以榮所生
中焉有以立其身施若未究而志固有定亦未爲不
遇也史臣表之諛墓也哉

贈刑部主事葉公封太安人高氏墓表

湖廣按察副使葉君觀於東洲桐爲丙子丁丑兩同
年君痛其二親之不可作也介使馳狀來京師以墓
表謁曰惟我先贈君刑部主事樂庵翁者諱萬字楚
榮生成化三年五月十八日卒正德十三年十二月

二十二日葬于蜀岡禪智寺之西原則丙申四月庚
申日也暨我先封妣太安人高生成化某年七月八
日卒嘉靖某年十月七日葬合先君窆則丙午十二
月十三日也墓石久虛以待夫子願爲二逝者表用
垂不朽桐曰表也者表其德也表夫婦者表合德也
桐家食時嘗拜翁於竹西堂下安人年六十時嘗壽
以文是桐知二逝者之素舊矣表安能辭按狀葉之
先婺州人樓姓以其父衛十戶諱賢者出嗣母舅葉
思銘後遂姓葉居江都娶於蘇生五丈夫子贈翁其
第五子也封安人裔出尚書宮保宗選公乃封工部

主事欽之女也其世系詳於黃雪洲司馬盛蜀岡岡
卿二誌銘亡庸複述已惟翁氣和質重雅量直中誠
可動物正足表俗安人則淑質端莊言動不苟以禮
自閑克循順軌是則茂稟懿行可合表者一也惟翁
竭力事親所欲必遂臨喪守禮哀思成疾安人則敬
事舅姑安寢始退衣食親供進侍不急是其純孝敦
本可合表者二也惟翁友于伯仲推產讓財一錢尺
帛無私妻子安人則勸翁退讓善處娣姒力勤守儉
囊無私畜是其宜家睦親可合表者三也惟翁庭訓嚴
飭務期成立麥舟示義勗以濟物安人則延師教子
程課責義親黨吊慶必期從厚是則淑後好施可合
表者四也為之嗣者有四子三女五孫皆肖德不羣
且並拜顯褒壽考以終亦難也已今夫匹夫匹婦一
行可述君子取焉况夫婦皆賢其容泯哉二逝者之
隱德細行可誦者無能悉表表其章章明者使天下
後世知葉氏之門有並美焉過斯基者亦宜式矣

封蔡節婦姜氏墓表

蔡母諱妙慧者江都處士暉之女爇之配史館生斯
之母也以嘉靖壬寅八月二十四日卒圻以某年某
月某日改葬其先人於某山原奉母柩合而封焉廼

虛墓石謁予于南省願表母平生予曰名實貴符言
斯有徵母之可表者曷徵哉圻涕泗漣漣下出秋曹
卿蔡君汝楠狀以徵其言曰母氏室處時敏穎迥軼
羣兒閑閨範力女紅凜然以禮自防弟妹中有怠且
嬉者每規以正厥母高亦倚以爲安焉於是宗黨閭
里莫不稱曰姜有賢女母既歸蔡以不及事姑姜爲
恨事其舅氏藿軒公繼姑陳甚謹藿軒公以貢士家
食理生無羨陳生諸叔孱弱未立母獨任苦辛操井
臼具饘殮勤勤怡怡必得其歡而後已於是閭里郡
邑莫不稱曰蔡有孝婦弘治辛亥燠以力困過勞年

二十八而卒母時少夫一歲哀過淚血病篤亦垂死
以藥迺生或欲奪其節母抱圻哭曰吾所不死者
以有此孤耳吾嫁姑安歸終其身七十八年冰蘖其
操如一日於是郡邑鄰封無不稱曰蔡有節婦燠死
圻始八歲舅氏時任大同都司斷事母携之從無何
舅氏卒家甚貧母以教子爲首務圻少頗放逸母痛
繩之圻遂改行業儒駸駸有軒舉志既長嫺文詞二
六書爲名公墨士所器重正德間逆濠變作圻獻禦
賊五策於維揚將守瑤嘉靖初御史秦君鉞檄圻緝
武皇南巡實錄尋受知於時宰桂公薦入史館桂罷

相圻爲抗疏請皆母之訓也於是京師中外莫不稱
曰蔡有慈母子讀之既廼歎曰嗟乎夫人有一行君
子無棄焉况全懿乎嘗論之曰善原於孝母氏仁愛
實出天性聞爇死之日舅氏問曰爇死何囑對曰夫
但以先姑久不祀囑婦以是請舅氏感焉姜遂入祀
嗟夫茲非母氏之孝篤其生而及之遠者哉惟孝故
節惟節故慈爲女之賢養固有體矣今日蒙 恩旌
節嗣日昌大後昆孝之獲報可涯也哉是宜表之以
風來祀

迪功郎見一盛公墓表

嗚乎此吾外祖盛公第三遷之墓也公生於宣德己
酉五月二十一日卒於弘治辛亥九月二十八日得
年六十三初葬於禮安鄉故縣運河之南吾祖朴庵
宗伯翁爲表其墓矣江齒土感嘉靖元年復遷北原
江愈逼厥孫時復遷公暨父叔諸塚於餘中張竈港
東嘉靖二十七年二月二十一日也邈公之沒甲子
僅一週耳碑字剝落殆半時復謁予表之予奉讀先
祖之文感外祖之存沒再拜流涕按故表增新跡而
言曰公之先祖仲哲父濂字本清世有隱德爲海門

右族母謝氏成氏公諱英字世傑少游邑庠性豪邁
穎悟過人弱冠補廩膳生久不得志於場屋歲貢試
天庭得上選公曰吾平生抗志青雲不能汨汨居人
下迺今庠序畢業矣苟得授一散秩逍遙林丘脾睨
卿相不賢於奔走空溷中耶遂謁銓曹拜職迪功郎
以歸隱特構一軒為栖息所扁曰見一因以自號蓋
取昔人林下何曾見一人義也居常焚香掃地與至
輒端坐彈琴庭畜一鶴琴罷或呼鶴引舞嘯詠竟日
客至則雄談高論聲徹於外聽者唯唯不能出一語
至求田問舍之事不屑為也是以達官閭里共賢之

稱曰盛公盛公鄉有不決事每求正於公配潘氏性
溫惠事公唯謹正德十一年卒得年八十有六子三
儀太學生密縣簿室李氏姜氏壽八十一儼太學生
勤學志科目未遂卒室崔氏潘氏僕庠生蚤卒室戴
氏三女長適吾父宗伯公崑贈淑人次適戴浩次適
孫蕃孫男四長業太學生隆平訓導固安教諭次爵
蚤卒次壽次即時曾孫九一元應龍庠生應蛟應魁
應期應陽應鍾俱業儒二尚幼嗚乎公之高尚桐已
表諸邑志逸士傳中茲復表其墓公庶幾不朽矣乎

崔東洲集卷之十九

維揚崔桐撰

傳四篇

蜀岡先生傳

蜀岡先生者揚之江都人也盛姓名儀字德章江都
有蜀山故號蜀岡云先生襁抱中即能記誦少長苦
志績學不憚寒暑領戊午鄉薦第六人卒業太學兩
居元選登乙丑進士第先生於古今書無所不讀故
於天下難易言亦無所不能為觀政吏曹時能抗逆
瑾不為致書冢宰剛介之聲已藉藉在人及主事禮

曹數以外夷進事抑權倖王永又執奏不當加賞
誘降夷人怒逆瑾銓曹以爲賢改監察御史劾天下
不職吏若干人具奏民間利病若干條風稜棘棘無
所忌避外補山東僉事遷副使歷職幾十年有巨寇
劉宸輩攻城邑殺長吏勢甚劇先生募智將驍卒躬
親矢石間多爲方畧斬首千餘級境內以寧後二年
商河盜起復建議官軍入城支糧緩不及事請遣官
齎銀隨所至買糧以給賊遂撲滅迺若問賊吏誅權
猾寬疑獄理侵漁卹夫役凡可以興革者不難以身
任之東藩之政一時爲新服闕改雲南典屯政摘發

諸衛侵冒糧銀吏百餘人咸帖然輸服無稱冤者遷
湖廣廉使久滯之獄剖決如流守令雖遠在數千里
悉廉其才否以公舉刺時湖省多盜建議置僉事一
人專督江防兼理兵備一人駐長沙諸郡嗣是水陸
無虞民歸德焉遷本省左布政使會 朝廷遣大臣
取大木索價徵夫一省騷動先生請以買木羨餘次
第雇役民困稍蘇又 顯陵之役計費不貲迺釐蠲
內使崔文務在節省又歲凶民饑人情洶洶迺蠲
已責散儲掄幣所全活者甚衆先是先生以入 觀
可否屬吏忤當銜久之始遷太僕卿時甘肅用兵

詔解馬二千匹給軍先生議每郡四更解夫事獲不
擾又議置別庫以儲露積無何以不偶於俗被論得
聞住既以 顯陵功詔致仕先生性至孝友學術醇
正嘗議定曾子廟制應 詔陳言請崇尚周朱釐正
文體為士論所避居官勵志清白林居惟舊廬數椽
足以容膝薄田數畝足以充虛愉愉焉著書授徒訓
子力農若不以為窘也對客談論經史品題今昔人
物亶亶不倦語及求田問舍事笑而不答每出城市
雖闐闐鄙夫亦曰盛公來矣是吾鄉好人好人鴻儒
學士稱志行端潔者必曰蜀岡先生後生小子稱經
業精到者必曰蜀岡先生嗟夫先生之學行才望有
此所得亦多矣程之豐祿峻爵於世道無所軒輊者
賢不肖何如哉

贈光祿寺少卿范公死節傳

范光祿諱琛字廷獻號東山宣城人高祖惠任德冀
二州同知祖斯福父晟母施氏光祿狀貌魁梧雙目
炯炯性剛直負氣不能為澳忍事少游郡學有文聲
宿學老儒多所推重督學御史浮梁戴公少可許得
光祿試卷大器之成化丁酉中應天鄉薦屢試春官
不偶弘治癸丑謁選天官得江西清江令以母憂去

服闋改令瑞金居數月闔廣賊作夜半殺門卒攻城突入時瑞民洶洶竄伏左右有強光祿急去者光祿怒髮上指挺然撫膺曰吾去土誰與守吾生平欲丈夫其行而學兒女子以自免於節義謂何遂從民兵數十人迎敵殺賊二十人有奇相持至翌日賊少却薄暮光祿力屈爲賊所得挾至宋卒舍所問庫藏所有光祿不爲屈詈不絕口賊憤遂遇害時乙丑歲正月二日也守臣上其狀

天子哀之贈光祿寺少卿賜葬祭命有司廟祀立石廕其子麟爲國子生光祿家居喜賑卹貧乏爲閭里所德治清江平賦興學屢白疑獄瑞金俗尚行賄公禁之無敢奸者死之年若干

史臣桐曰予讀武宗實錄乙丑之寇臨江瑞州新淦永新諸郡被毒多矣而守令非無其人以身徇民者周副使憲范知縣琛二人耳琛小臣也而能樹節炳炳可尚也已使之當塗分闡緩急其可倚也夫菁莪之化琛奚負焉而景風之恩志士將無有所興乎
誥封一品夫人許母李氏傳

一品夫人者柱國少傅文淵閣大學士松臯許公之配冢宰襄毅公之子婦也夫人姓李氏世爲河南洛

陽人父祥母鄧氏祥與襄毅公並以才名擅一時最相友善襄毅公憲副山東祥以貢士任濟南推官修好如故不以司屬相臨也襄毅公爲松臯公謁婚於祥祥雅愛松臯公知其必爲大器遂以夫人妻之時合卺濟南無何偕夫人歸於許一品太夫人高家訓嚴肅夫人孝養舅姑自任勤苦一衣一食必躬必親太夫人甚宜之松臯公舉丙辰進士授大名推官遷監察御史戚族爭榮之夫人未嘗有矜色松臯公以論事謫知臨淄會襄毅公卒行服三年夫人哀毀盡禮殯葬質祭咸經綜理比暮則抱兒潛卧高夫人側

逮曉始覺也既松臯公陟浙臯僉憲副使提學山西叅政四川布政浙藩夫人隨任念太夫人戀戀不釋得一異味輒寄供太夫人曰吾不忍以甘旨自奉也松臯公陟光祿卿至刑戶二曹尚書夫人亦由孺人累四封至一品夫人矣尚念太夫人年高還籍省侍以百金買地於城西立舍鑄佛爲太夫人祈壽考松臯公尋亦乞歸養太夫人卒夫人哀痛幾滅性蓋其至孝出於天性故不爲老少窮達所移如此夫人性溫淑謙挹處娣姒有禮嘗從 皇后親蠶內苑以伯氏莊敏公一品夫人坐列已下踣踣屢顧不自安命

婦中貴廉其故莫不稱嘆處家甚儉約然好施舍憂
居中值歲凶每以布粟褊問親里貧乏者又置棺百
具以給貧不能葬者辛丑年松臯公以冢宰乞休尋
復 召典銓衡次年冬夫人得痿疾乙巳漸劇以八
月二日卒于京師時公已登台輔矣距其生成化十
年四月二十九日得年七十有二禮曹以計聞

天子哀之遣行人徐洛治葬事賜祭二壇蓋殊典也
夫人蚤歲生子女凡數乳皆夭折一子俱以父蔭累
官督府經歷陟辰州知府以夫人疾請內職侍養改
禮部員外郎辦中書事 欽給正四品服女三側室

王氏出長適陝西都指揮張蓋臣次適山西監生張
長士次適洛陽王憲副子生員王陽生孫男二長茂
祿蚤折次茂禎夫人卒之日桐往弔焉松臯公涕滂
淫下語桐曰夫人平生舅姑嚴則養而能敬吾性約
則儉而不侈乏婢僕則職勞不倦置貲蓄則安而無
怨計匹吾五十五年矣中間遭兒女夭折之苦奔馳
悲愁之艱亦備嘗矣今吾沐 朝廷厚恩高爵重祿
所欲可致而夫人棄予以逝何能爲情耶桐曰夫人
賢矣貴矣壽矣其有終矣尚何憾乎公之所不已者
夫婦之私也夫人之所無憾者義命之公也松臯公

曰唯唯若予之言吾亦度幾無憾矣乎遂自爲狀屬
桐傳之以昭閭懿章 君寵垂不朽云

朝列大夫張君傳

張君諱萱字德暉號願拙松江上海人也自其先桂
五居上海之高陽里得名張家浜張姓始著桂五生
王蟾王蟾生隱德隱德生志恒恒生述述生熙熙君
王父也字民和號梅溪君王母潘儷梅溪有令德君
生而簡重不喜兒弄弱齡就業於伯兄萊守以英敏
見奇比長屢不得志於有司君益勵力積學不爲疲
也竟領弘治戊午鄉薦登壬戌進士第筮授鄱陽知

縣鄱治附饒史姦民衰號稱難治且歲輸無藝徭繁
力屈民以爲病君至一切紓以惠政而抑強蠲污獨
加嚴焉邑有滯獄君爲疑者讞之濫者勿聽刑以平
稱機兵之役冗食者衆君令分番歸農以省工費之
半俗尚陰陽家說親死久不殯悉示以法里無留喪
焉甫三年以案治一小吏不假借吏遂巧詆君於上
官坐當調職至京師時逆瑾方醖朝士多濡足其門
君獨不往時論高之踰年得嶧縣君曰官可改志不
可改也嶧之豪右多匿丁田以輕賦君悉括其實無
所詭隱學宮時廡側大爲繕葺以敦歲祀故有五倉

散置君聚爲一以便民且省斗級費民有露齒者置
漏澤園泊義塚戒所在拵埋之諸所營辦咸取庀贖
金金無入私橐者君抱公履方不能偶俗以稱時求
以是失使臣意至刺君於 朝然輿論方歸望於君
銓部亦廉其素得不絀正德庚午改政和政和小邑
也比域浙省每爲慶元龍泉諸縣流民所苦君嚴令
慎防民賴不擾巨室多隱蔽田租致小民有無稅之
徵君曰稅以田錯制也有徵無歸毒在巨室爲覈免
之簿書遂正巡按賀御史賢之移文兩浙以式先是
庠士又誦科第君躬親課試登薦遂不乏壬申擢守

茶陵州州境比江右民雜習悍盜賊多恃黨亡匪不
可捕詰君類編其族威以連坐民懼盜息山鄉豪猾
有侵負官物者君置元惡於法民知更行永新民越
境占田歲負稅餘三百石君狀其弊白當道責永新
吏督徵轉輸以紓民累至若禁市薺均賑卹可以利
民者靡弗寘力焉巡撫安成劉公荆山王公文章薦
君未及報以母憂去丁丑改潞州州有藩府輿役之
擾且民以土紬爲累君悉禁之先是歲徵無定制右
族緣以爲奸君善爲會計使邊輸存留輕重相等焉
時逆彬勢赫赫君不難以身翼患民倚以安巡撫張

公嘉其迹特旌異之無何擢湖廣僉事去之日民遮道攀泣相率畫像建祠以俎豆君君蒞湖臬恩威兼著長寶二府報獲盜百有四十人君察証引者衆悉原之尤嚴獄囚瘠死之禁不得令仇家有所中傷時有捕蛇之役君遣囚徒行得無擾良民麻城馬政多奸荆厥額外濫稅皆釐正其弊當道稱其名冠湖臬威加荆岳治迹考最嘉靖壬午擢本省叅議主糧儲先是侵剋積弊邊衛尤甚君立法禁處奸無所售卒以直亮不阿忤意巡撫引疾致政既歸怡情泉壑謝跡城府構一亭扁曰願拙日課二子諸孫其中意豁

如也君性素友愛喜分施梅溪翁既卒撫二庶第甚恩歲賙租入餘於祠堂以給宗族貧乏者鄉人嘗負五百餘金悉焚券不責償其歷官居鄉動皆可法如此居五年以疾卒時嘉靖丁亥三月十有六日也距其生爲天順己卯六月二十有八日得年六十有九配陸氏有婦道先君十有八年卒繼室孔氏先聖五十八代孫子男二長鳴謙領正德丙子鄉薦次鳴殷女二長適山拱宸次適朱朝寵孫男六長仕郡庠生次儒次俸次化次儲孫女三長適郡庠生沈盤次許聘姚審次幼庚寅年松江府庠生高君行義群請

於督學御史馮君表祀鄉賢祠墓從其先在曹烏涇之原

論曰士君子立心行已寧見短於小人毋見罪於君子見短於小人其一時鉏鋸擠紕若有不可堪者而時熙議定卒樹風聲見罪於君子則生前之竊享不足以贖身後之公誅亦何益哉張大夫盡瘁王事餘二十年中間愠於群小迂意上官秩不過朝列以終其身斯不謂咥生於義功浮於祿者耶然而去鄙則劉進士錄爲志名宦去嵬則王家宰華爲記嘉政去政和則滕侍御祐爲記興學去茶陵則張太史治爲傳循良去潞則崔司成銑爲記生祠嗟夫鴻垂碩望者大夫者視婉婉小夫孰顯而孰晦耶吾錄大夫行而重有感焉

說一篇

克齋說

大司徒王翁以克名其齋理儒學士重名繹義爲之論者甚悉以已對禮者其旨精以已對人者其旨法以克爲能者其旨捷測微探眇摩壘纏纏若莫涯涘客有求其是於司徒翁者翁笑而不答客廼謁諸東洲崔子崔子曰夫道淵已浩已莫可垠壖已足故以

精求者以精應以徂求者以徂應以健求者以健應
譬如日月懸天旁窺四顧何照非明千竅百川何地
非影是故以萬求焉象若顯蒙以一求焉會有歸極
條分縷析皆可明道也左宜右有皆可行道也子盍
考諸司徒翁之素乎縈已靜修動中繩墨秉公履直
一節不渝斯不亦克已復禮之義乎排難解紛抑浮
惜費邦儲臺憲肅紀阜民斯不亦視人爲已萬物一
體之義乎秩履崇卑事歷夷險軼譖雋猷荷負不屈
斯不亦克身克職之義乎夫道一而已矣即翁之行
以本其心即翁之心以原其道即翁之道以證其名
可以思過半矣客若有得焉退而語諸翁翁曰噫嘻
予何有得於是哉子其問諸太初

謚議一篇

襄毅潘公謚議

兵部尚書兼右副都御史潘公鑑之卒也

天子從禮臣之議俞內閣之擬贈太子太保賜謚曰
襄毅蓋謚法所謂因事有功果而能斷者也公以清
姿雅操闕才碩負峻擢賢科擢歷中外治狀之章章
者如筮仕廷評則辨孀婦之誣子讞未決之群狽僉
事福建則弭惠安南安之劇寇平福州邵武之叛卒

兵備貴州則發楊章之秘譎再任信陽則舉捕蝗之
荒政廉訪四川則四指揮揭黃之冤白右轄江西則
出納詐僞之弊革左轄四川則軍餉之艱紓巡撫四
川則均糧之法行麗江之夷靖擒關南馬興而蜀北
以安戮深溝番賊而運道無阻及其共 陵殿之後
也則採運八省議蠲派辦小民之擾至若量材節費
一疏愛國憂民之義溢於詞表 太廟之役也理屬
吏之誣獄抑上官之濫典及其奏功蒙賞則以優弛
疲民爲請斯不謂因事有功矣乎夫見利而競進見
害而逡巡人情之恒也公直節義氣不難艱險如誣

子之獄揭黃之疑雖犯怒刑曹事涉招毀而堅不可
移逆濠之變江關之防羣僚選悞而挺身徇往關南
多釁出羣策而卒收其功節費甦民兩疏批逆鱗而
無所恤斯不謂果而能斷矣乎桐考古者以一字爲
謚一字之褒難也謚以二字自周漢始而二字並美
尤難昔賈充晉武之幸臣也死而太常議謚曰荒帝
雖易以爲武而荒之稱卒不可拚唐蕭瑀亦賢臣也
然端直鯁亮近貞性多猜貳近褊故謚曰貞褊而美
惡並形若太保八者可謂名稱厥情而具美無憾矣
乎抑考公性純孝昔寓延平聞母施計匍匐北歸妻

子在省莫之顧也遷貴州過里見其翁南峯公之哀
白也遲回不忍釋侍養踰年而後行傳曰事君不忠
非孝也蒞官不敬非孝也戰陳無勇非孝也又曰孝
弟也者其爲仁之本與公既立其本矣夫何有於道
生謚以襄毅也實宜

崔東洲集卷之十九

崔東洲集卷之二十

維揚崔桐撰

祭文十篇

祭大司成曾先生文

於乎先生鴻聲碩負自家食時已藉藉士林矣既而
魁天下遊內翰陟師氏名重中外亦有年矣在告巖
居望繫人心莫不翹首其一起者又餘十年矣於乎
天之奪先生胡爾其太速也哉惟先生之師模兩京
也選極海內教紀丕植文陋雕蟲學耻章句呂正獻
公之究心經理足端教化之源揚龜山之學本正傳

大爲諸生慰勞是以東序化弘上庠學振祁祁髦士
升堂入室聯翩甲第者濟濟惟人功在斯文殆不細
矣使先生翻然再起則黃閣秉均蒼生造福又豈淺
淺也哉然而臺司迭薦而高世彌堅竟爾東壁受蝕
下壚長游可慨已夫不知者以爲先生不遇於天下
知者以爲非先生之不遇天下之不幸也是大不然
夫沃其根者蕃其末深其源者長其流先生道尊業
廣還元返朴掃八風之舞識兩疏之機使頑者庶懦
者立一出一處所以沃吾道之根深吾道之源者弘
矣功在吾道功在斯民也是先生未爲不遇而天下

亦大有幸也歟某等追瞻山斗恨遠光儀俎豆寄衷
東臨再再尚饗

祭東軒張先生文 陽峯廼翁

於乎先生器存家聲才映時賢騫舉要衢履潔秉堅
羽儀 宸署翊化臬藩懋樹嘉政勲策黼遙烟霞心
會爰屏世喧閒閒丘林頤和涵玄天錫茂胤以引世
傳縱橫藻翰瀛苑名懸日陳墳典啓沃 帝前錫予
孔熙紫紱金蓮先生逝矣哀徽曠 帝曰有子昭
典載宣廼藏廼祀後祉自天某有在史館令子同官
愛我教我契托十年今也南遊訪舊弔遺寄情觴豆

江漢茫然尚饗

祈晴文

雨本澤物然天戾氣則為妖水本利人然地脅陽則為災神之所知也夫民惟邦本穀惟民命有司也者直民命以為本者也而神明也者祐之民以翼有司者也詩曰日社有神秉畀炎火又曰敬恭神明宜無悔怒蓋憂患者在乎人而紓患者望乎神吾民之厄人神共有責焉矣於乎何華楚之民往歲告旱嗣歲告溢旱溢糾纏降罰實多即今自春徂夏夏徂秋十日九雨雨淫陰伏江湘湖澤淼焉巨浸市闐為河宮穀吐就蒲羸地埔沉薨棄岸平谷來牟病而昭賜弗蒙禾稼沒而有秋何獲是將剗我根本而重可哀焉者也意者大庭弛修靡反廼闕而重我神怒與然明明天子洗秉素慮露禱走幣用勤弭恤者至矣意者表誠啓聖仁愛我君與而民其隄危胡可以輕試與將無桐等奉公不職貪墨毒尅苞苴在門鬱詛在園絲征銖課神心不平垂割有衆與然一有於此罪在吾等而顧及之元元何哉有司有罪而貽之民非神之靈也若其無罪而罪吾民非神之仁也惟城隍之神鑒隲方省奉有明勅若曰罔聞幽明之責

謂何惟風雲雷雨諸神曜照震蕩帝命率育若曰罔
聞咸亨之德謂何惟山川社稷各有疆域各載厚德
德不在物時祀之典謂何神何不飛螭節騁龍輿上
告天神下徹地祇挽否爲泰轉沴爲祥雲旗拂霽風
馭時揚羲和運暉河伯受職土神呈瑞先農協力則
民受嘉生邦本盤石庶乎 皇心載寧百工惟休而
神之時薦歲祀亦得世享乎報酌矣謹告

祭白侍御文

於乎哀哉先生之才修能壤負紉繹不窮足以翊乎
世猷先生之德姱養弗遷任道以朴足以追乎前修
先生之器溥濶不苟淵涵不察足以隘乎時儔抱
南趨經營帝丘盡瘁以事知殫慮周以王臣之匪懈
固造物之所優而白簡方嚴丹衷甫露溘異化而載
休意者至人之不恒美忌多取俾英華之奄收意者
帝愛厥才云徵記乎玉樓意者悲氛壤之迫阨軼九
垓凌六氣渺恬愉而上浮於乎先生人生過隙日月
幹嬗誰其能留先生之獨留者芳聲茂績洋洋纒纒
與正氣而並邁夫何憾哉然而攀輻執紼薦醴旅蓋
愴愴而弗忍舍搖搖而若何求殆我同事者之所私
不能不臨秋颺而杖淚聯冥幢而寄憂也尚饗

禱雨文

工有常憲帝有顯澤赫赫乎命用正厥德嗟嗟楚方
歲不順成匪水則旱民鮮嘉生天之不吊實民之尤
民亦何知召之有由惟予群工靡修多闕適見於天
開右弗屑火炎南陸東井裂光靡稼不萎靡草不黃
淫陽鬱蒸札瘥有作施舍徬徨鬼神廼索神靈合天
民命依神敢崇敢告暴棄具陳庶寮既禱申之庶長
降物展悃神若莫享惟神孔章淑慝是司工有弗率
神鑒勿遺弘我民罰潤以膏液興雨祁祁紆憂舉阨
小民不咨庶正載安神亦表靈會煦之寬尚饗

謝雨文

天心仁愛施無棄物神享惟誠非馨黍稷民之多艱
歲事蹇逼吾工弗逮策勵罔克敷祚陳詞用靳龐德
皇靈不違降鑒頃刻灑以甘霖沈我沴域蒸黎歡呼
懸解焚熄俯循何修奄受歆格神實秉鈞恩威莫測
惟神終惠閱茲孔棘汪澤沛仁有流無塞時雨時暘
司命任職有生熙熙有穡嶷嶷民工並休邦本是翼
尚饗

祭陸儼山宮詹文

桐與先生產唯限於一水道寔契於同源相聞於邕

角之年受知於場屋之雅洵沫於風塵之鄉邂逅於
雲龍之會悲涼於離別之秋馳情於魚鴈之托期我
以遠大翊我以高明屬我以愛子示我以芻臆真道
義之師友也桐茲抱痛海廬念及交游誼分雖夢寐
食息未嘗不在儼山方期天落佳辰再從先生之躅
覲德金相聯班玉笋相引相翼攄愚誠以上報天
子下究宿學而先生已矣且柰何哉意者天下之至
寶爲造物者忌不欲久在人間邪抑造物者有意於
先生故畱其終以留未罄之休於後人邪嗚呼海濶
天長瞻望何及徒有腸切聲吞遙對南雲耳祇遣一

腸身羈心越哀哉尚饗

祭曹邦彥戶曹司務文

嗟乎先生於吾輩同登南圻丙子賢書計於今餘三
十年矣日月代嬗亨屯異遇生死殊塗回首疇昔共
醉鹿鳴連翩白下之英屈指落落如晨星秋葉存者
幾何幸而先生筮仕地曹羽翼邦儲吾輩三四人亦
各以薄秩合簪京署論交話舊少罄平生而先生詎
云舍我而逝爲情當何如哉念先生學醇行篤言訥
貌溫惴惴小心不讐桀黠累資積勞已五六稔大夫
清陟例在旦夕先生奄爾違榮靡終後祿天之報善

人固若是耶意者天於善人生食其報不若死昭其名享厚其躬不若慶垂其後先生蓋棺之秋名卿碩士僚友鄉曲莫不哀哀嘆息羣誦宿賢而令子以奇雋之器尋魁鄉薦是先生之令聞益章芳緒有托彼蒼者之報善人未謂不豐且遠也斯可以瞑目矣桐等醑羞展悃感倍恒情追叙久要實勞心曲哀哉尚饗

祭蒲亭文敏公墓文

門生桐等謹奠于文敏李公之墓曰嗟乎先生之成就吾儕也或擢秀南圻或連茹冀北媿爨下之九材

幸薰收而並蓄先生之教育吾儕也開我迷途端我法程實恩同乎骨肉豈訖止於師生先生之俯愛吾儕也弛嚴範而色引展情欸於燕語坐春陽於藤軒剪丙夜之蓮炬念師門之睽離紛宦轍而不齊曾歲月之幾何成求訣而長違嗟乎先生玉粹金昭祥麟威鳳逸韻清標 聖朝梁棟往牒爬羅於蓬觀詞鋒景煥乎仙瀛未屑於絺章繪句才兼夫錢穀甲兵鈞秉台衡羨調鼎醵時屬望乎弘摠 帝有須于亮采夫何彼蒼奪我哲人匪小子之私戚關世道之亨屯桐等過董墓而生悲媿玄塚之莫助悽椽隧之秋風

嘆楷林之朝露德深感倍詞切心馳椒棗肅感神其
有知

祭周白川太宰文

嗟乎先生之不可作也真邪非邪英靈正氣今安歸
邪念先生之風範修髯皓髮雙睛炯然神采整峻動
履便旋群以爲天下之慶必求其年奉瞻未幾胡云
已矣誰能舍旃先生學醇而古蚤涉道涯靜而有養
介而不華諫垣抗論臺憲繩邪厥歷中外一節無瑕
蕭然靡豪尺寸莫加是之謂有爲有守知有國而忘
其家先生才長而毅行篤而純振振君子蹇蹇王臣

克敬克戒攄悃一人夙興夜寐獨任苦辛旌別淑慝
盡瘁以淪是之謂奉公委質知有君而忘其身先生
之未秉銓衡也公論攸歸望之如渴既拜新命也實
情翕然朝野共悅彼蒼者天胡福之而遽歿予之而
尋奪凡厥有知孰不爲之歎歎哽咽况在同鄉舊愛
情何能遏嗟乎有酒旅進有殺旅進聊寄哀思神其
弗吐尚饗

卷之二十

楊東洲集卷之二十



